



sit 1947

Fasnacht 2012

Alti Basler Dante

Isch die Mittleri Brugg bedroot?

D' Schiffahrt het e gross Problem;
die mittler Brugg zwar alt und scheen;
kasch vili Schiff nur halb belade,
will suscht die halb Fracht giengt bade.

Die Brugg isch znidrig und au zäng.
Mit grosser Fracht git's e Gedräng;
Und hi und do blibt e Schiff gar stecke
oder em Käpten si Stand duet verrecke.

Die Brugg muess wäg, es isch kei Frog.
Für d' Schiffahrt nur e grossi Blog.
Mänge Laschti könntsch dir schängge
Wo jetzt dur Basel muess durerängge.

Doch 's Gschrei isch gross: Sin dir verruggt !
Basel ohni Mittleri Brugg !
Kei Käppeli und kei Sandschtei meh;
E modärni Isebrugg wän dir seh ?

Sogar zum Politikum duet's mutiere.
Wo SVP und SP duet zämmefiere.
Für eimol hän si die glichi Meinig:
D' Brugg muess wäg! Sin si sich einig !

Nur 's Baudep findet das ganz schlächt.
Sit 1905 isch d' Brugg so rächt.
Die blibt do shto ! Si ghert zur Stadt.
Mir finde si scheen; händ 's Motze satt !

Doch gän mir jetzt de Schiffer 's Wort;
Tagtäglich passiere die dä gförligi Ort:
Ich, Michel aus Holland muss immer zrück,
wegen die Basler mit ihre Brück.

800 Kilometer kann ich fahre
ohne solche blöde Gefahre.
In Basel muss ich halb entlade,
wegen dem blöde flache Flade.

Doch lön mer de Michel witer schimpfe
und unseri Brugg nüm meh verunglimpfe.
Wände mir uns der Zuekunft zue.
E neii Brugg gäbt gwüss meh Rue.

Die kennt jo so wie in London si.
D' Japse und d' Chinese wäre scho derbi.
Und 's Käppeli miest me nit verliere;
An de Bruggekepf kentisch vier montiere.

Oder spann e neii in grossem Boge
's Käppeli schwebti no witer obe.
Das wär e Fraid fir alli Turischte;
schwebend käme si in ihri Fotikischte.

Nur mir arme alti Basler Dante,
verlierte unsere guete Bekannte.
Sit 65 Joor mit unserem Kaare
Dien mir iber die Brugg scho fahre !

S Pensionsalter hän mir jetzt erreicht;
all die Joor hän is gut geicht.
Drum wän mir vo Ruehestand gar nit ghere
Und d' Frau Fasnacht witer verehere!

In voller Fahrt und immer fit,
mache mir no mängs Joor mit !
Mir wänn nur eins: mit Drummle und Pfiffe,
noch der negschte Fasnacht griffe.

Wenn dr Rhy unter der Brugg no dure rennt
und 's uf dr Brugg mol wieder glemmt,
isch 's Fasnacht, do kasch sicher si
und 's Cortège au no nit verbi.

*D Ladäärne-Uusstellig uff em Minschterplatz und
D' Waage- und Reggwisyte-Uusstellig bi dr
Kasäärne sin vom Määntig znacht bis am Mittwuch
demoorge! Deert und an de 3 Verkaufsständ (CINS)
in dr Stadt ka me n au alli Zeedel und
Schnitzelbängg, d' Blaggedde und dr Rädäbäng
kaufe.*
